

INUIT ATAQATIGIIT INATSIARTUNI



14. august 2025

UKA2025/91

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inatsisissatut siunnersuutinik suliaqartarnek pillugu malitassiat atuuttut allanngortinneqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni inatsisissatut siunnersuutip nassuiaataani, nunat tamat akornanni pisussaaffinnut, nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersuummi inuit pisinanatitaaffiinut aamma nunap inoqqaavisa pisinnaatitaaffiinut tunngasunik nassuiaasiortoqartassalluni. Naalakkersuisut suleriaasiat nutaaq ulloq 1. januar 2026 atuutilissaaq.

(Inatsisartunut ilaasortaq Mariane Paviassen Jensen, Inuit Ataqatigiit)

Tunngavilersuut:

Nunatta namminersuleriartuinnarneranut ilutigitillugu nunatsinni innuttaasut inuttut pisinnaatitaaffii ersarissut sanioqqunneqarsinnaanngitsullu pingaarnerpaanut ilaapput.

Namminersornermut pillugu Inatsit najoqqutaralugu oqartussaaffinnik namminek aqutassatsinnik pilersitsisussaavugut. Siunissami oqartussaaffiit amerlanerusut akisussaaffigilertussaavagut. Tassungalu ingerlanitsinni nunat siunissami suleqatigiumaagassatta qanoq naalakkersuinikkut naleqartitaqarnerput malinnaaffigisussaavaat.

Oqartussaaffinnik pilersitsinerput ilutigalugu naalakkersuinikkut ingerlatsinermi innuttaasut, inuit pisinnaatitaaffiinik nunallu inoqqaavisa pisinnaatitaaffiinik naleqartitaqarnerput naalakkersuinikkut suleriaasitsinni innuttaasut takusinnaasariaqarpaat. Naleqartitat Naalakkersuisut isertuaatsumik suleriuseqarnerisigut suliap aallartinneraniit inatsisissatut saqqummiutassatut siunniussap

INUIT ATAQATIGIIT INATSISSARTUNI



pisinnaatitaaffinnut atuuttunut kingunerisassai allaaserineqartalissapput. Inatsisissatut siunnersuutit suliarineqartut pisinnaatitaaffinnut atuuttunut tunngatillugu kinguneqaataasa qulaajaavigineqartarnissaat eqqarsaataavoq. Taamaaliornikkut annertuumik suliap aallartinneraniit pisinnaatitaaffiit annertunerusumik eqqummaariffigineqartarnissaat qulakkiissavarput. Taamaaliornitsiguttaa siunnersoqatigiit inuit pisinnaatitaaffiik suliaqartut soqutigisaqatigiillumi allat siunnersuilluarsinnaaneratt inatsisissallu aallaqqaammut suliarineqarneraniit akuutinneqarnerunissaat qulakkeersinnaavarput.

Siunissaq eqqarsaatigalugu Kalaallit inuiaat oqartussaaffiit Danskit Naalagaaffianniikkunnaarlutik nunatsinni oqartussaaffigilernerat ilutigalugit pisinnaatitaaffiit suut nunatsinni atuunnersut qulakkeeqqissaartuarneqartariaqarput. Naalakkersuisut inatsisinik nutaanik suliarinninnerminni inuit pisinnaatitaaffii, ingammillu nunap inoqqaavisa pisinnaatitaaffii aallaavigisassavaat, taamaammallu 1. januar 2026 aallarnerfigalugu Naalakkersuisut suleriaatsiminnik allannguinnissaannik nutarterinissaannillu peqquneqarnissaannik Inatsisartunut aalajangernissaat kissaatigaara.

Nunatsinni isorartoqisumi inuiaqatigiit assigiinngisitaqaaluta nunaqartuusugut pisariaqartilluinnarparput ersarissunik pisinnaatitaaffeqarnissarput, Namminiilivikkiartornitsinni oqartussaaffiit suli pilersinngisagut pilersinneqarneranni pisariaqavippoq ersarissumik inatsisiliornikkut pisinnaatitaaffiit malillugit inatsisiliortarnissaq.

Partiit isumaat tusassallugu qilanaarpunga, Qujanaq.

Pisortanut aningaasatigut allaffissornikkullu kingunerisassai:

A/C fuldmægtigi ukiup affaanni suligasuarnissaa 500.000. kr.-nini akeqassasoq naatsorsuutigineqassaaq.

Namminersortunut aningaasatigut allaffissornikkullu kingunerisassai: Soqanngilaq

Innuttaasunut aningaasatigut allaffissornikkullu kingunerisassai:

Soqanngilaq.